



Lansamentu di rijkscultuurfondsen.org: ayudo pa petishon di supsidio pa e islanan ABCSSS

For di awe, organisashonnan kultural i kreadornan na Aruba, Boneiru, Kòrsou, Saba, Sint Eustatius i Sint Maarten por akudí na rijkscultuurfondsen.org. E wèpsait nobo akí ta un guia kla pa e seis fondonan di kultural di reino, na unda por haña un selekshon di posibilidatnan di supsidio.

Dikon rijkscultuurfondsen.org?

E wèpsait a nase den kombersashon ku kreadornan kultural i organisashonnan riba e islanan ABCSSS. For di kombersashonnan, bishitanan di trabou i interkambionan e idea a nase pa establese un lugá digital kaminda kreadornan i organisashonnan por haña fásilmente un fondo adekuá i areglonan di supsidio korespondiente. Rijkscultuurfondsen.org ta un plataforma sentral ku ta guia petishonarionan paso a paso na e posibilidatnan ku ta pas mas mihó ku nan plannan kultural.

Haña e supsidio adekuá den 2 stap

Un di e funshonnan mas importante di e wèpsait ta e ayudo digital pa petishon; un hèrmènt pa filtra, trahá na midí, ku kual e usuario ta mira den dos stap e areglonan ku ta pas mas mihó ku su plannan kultural. Ademas, e wèpsait ta ofresé resúmenan di un selekshon di areglonan di supsidio pa kada fondo, ofresé den kuater idioma: ingles, papiamentu, papiamento i hulandes. Unabes ku bo a filtra e areglo ku ta pas mas mihó ku bo plannan, bo ta wòrdu referí na e wèpsait di e fondo korekto.

Gilia Croes, trahadó di maneho di Kultura i Edukashon Hulanda Karibense, tokante rijkscultuurfondsen.org: "E tereno kultural den Karibe ta yená ku potensial, pero hopi kreadornan i organisashonnan kultural ta duda pa bula den e oséano profundo di supsidionan disponibel. Por ta difísil pa haña bo kaminda den tur e posibilidatnan. E wèpsait akí ta brinda un guia útil i ta yuda kreativonan karibense haña e sosten korekto. Ku mihó aksesio na medionan finansiero, e plataforma ta permití nan pa duna bida na nan plannan kultural i e pa hasi uso di e potensial kompletu di e tereno creativo karibense."

Pa kreadornan den henter Reino

E fondonan di kultura di reino ta dediká nan mes na hasi arte i kultura aksesibel pa tur hende, na Hulanda Oropeo i Hulanda Karibense. Nan ta stimulá inovashon, desaroyo di talento i konekshon entre kreadornan, organisashonnan i públiko den henter Reino.

E wèpsait ta diseña dor di e diseñadó arubiano Carla Garcia i ta enfatisá e konekshon akí: "E identidat visual di rijkscultuurfondsen.org ta inspirá pa e patrimonio kultural i arkitektóniko di e parti Karibense di Reino. E konsepto di diseña ta enfatisá intersekshonnan, konekshonnan, i límitenan, kual ta presentá kolaborashonnan i kamindanan kompartí na un manera visual."

Seis fondonan di kultura di reino

E wèpsait ta wòrdu manehá na nòmber di e seis fondonan di kultura di reino: Nederlands Filmfonds, Fonds Podiumkunsten, Fonds voor Cultuurparticipatie, Mondriaan Fonds, Nederlands Letterenfonds i Stimuleringsfonds Creatieve Industrie.

E fondonan akí, finansiá dor di ministerio di Enseñansa, Kultura i Siensia (OCW), ta duna sosten finansiero na organisashonnan kultural i kreadornan den henter Reino. Huntu nan ta finansiá tur disiplineanan kultural: arkitektura, kultura digital, diseña, arte visual, patrimonio, pelíkula, literatura, artenan di riba tarima i partisipashon i edukashon kultural.

Bishitá rijkscultuurfondsen.org i deskubrí kon e fondonan di kultura di reino por yuda bo hasi bo plannan kultural posibel.